

No te ao te uaratanga⁴
 Riro ki te po,
 Waiho noa hei tumanako
 Ma te ngakau.
 E hoa ma! Kauraka ia ra
 Hei whakatanguru;
 No te mea ia ra ko te rawa i riro
 Mai i a Hika-awa.⁵

Taku taumata e noho ai au
 Ko Paetawa ra,⁶
 'A marama au te titiro
 Ki Waipunapuna,⁷
 Ara haerenga mai no Te Perohuka;
 He tapu te whakahua.
 Kei tawhiti tohou tinana,
 Kei te Reotuku,⁸
 Kei Patea⁹ au e noho ana,
 Kei te Awarua;
 Mapu kau noa atu i konei.
 Au koha¹⁰ rauraro, i.

¹Okahu:—He puke kei Patea (Inland).

²Tane:—Mo Te Perohuka.

³Aiotanga:—Kaore ia i paingia ma te tane ra, tangohia ana e nga tungaane.

⁴Uaratanga:—Hiahiatanga

⁵Hika-awa:—Mona ake ano tera kupu.

⁶Paetawa:—Kei te taha o te awa o Rangitikei, kei te huarahi atu ki Heretaunga. Ko te kainga tera o ona tungaane.

⁷Waipunapuna:—Ko te kainga o Te Perohuka; ko to Ngati-Tama kainga tera.

⁸Te Reotuku:—He kainga, ko Kotuku-raeroa te tino ingoa. Ko te wahi tera i haria atu ai a Te Perohuka, ka mauria te wahine ki Paetawa.

⁹Patea: }
 Te Awarua: } Ko te ingoa o taua takiwa i Patea (ki te tuawhenua).

¹⁰Koha rauraro:—Ka ruha noa i te aroha.

155.—HE TANGI MO TE MANU MO KOROTANGI.

No Tainui.

Na Noka Hukanui o Awataha (Kawhia) i korero, na George Graham o Akarana i tuhi.

He waiata tenei i kaha te haere i roto i nga iwi, a kua tuhia kua taia ki nga pukapuka maha, ara:—

'Nga Moteatea' (Grey) p. 235: Kei reira e kiia ana na Rotorua.

McGregor 'Maori Songs' pp. 13, 51: Kei reira e kiia ana he tangi na tetahi tangata mo tona manu i tahuti, he mate kai.

Transactions, 41/277.

Journal Polynesian Society 26/138.

Tiwana Turi p. 64.